

# **Жинларга катта куч, маҳорат ва имконият берилган**



ШАЙХ МУҲАММАД СОДИҚ МУҲАММАД ЮСУФ  
**ЖИНЛАРГА КАТТА КУЧ,  
МАҲОРАТ ВА ИМКОНИЯТ БЕРИЛГАН**



11:05 / 27.10.2019 3131

Аллоҳ таоло Қуръони каримда шундай марҳамат қилади:

**«Бас, унга шамолни беминнат хизматкор қилиб қўйдик, унинг амри билан у ирода қилган томонга майин эсаверади. Яна барча бинокор ва ғаввос шайтонларни ҳам. Ва бошқаларини ҳам кишанланган ҳолда тўплаб»** (Сод сураси, 36-38-оятлар).

Ушбу оятларда Аллоҳ таоло Сулаймон алайҳиссаломга хос қилиб берган нарсалар зикр этилмоқда.

«Бас, унга шамолни беминнат хизматкор қилиб қўйдик».

Сулаймон алайҳиссалом нимани истаса, шамол шу истакка сўзсиз бўйсунадиган бўлди:

«...у ирода қилган томонга майин эсаверади».

Бу иш Аллоҳ таолога жуда осондир. Чунки Сулаймон алайҳиссалом ҳам, шамол ҳам Аллоҳ таоло яратган маҳлуқдир, Аллоҳ таолонинг иродаси остидаги халқдир. Шулардан бирини иккинчисига бўйсундириб қўйиш Аллоҳ таоло учун қийин иш эмас.

«Яна барча бинокор ва ғаввос шайтонларни ҳам» беминнат хизматкор қилиб қўйдик. Бинокор шайтон-жинлар у кишининг амрига бўйсуниб, оддий одамларнинг қудрати етмайдиган улкан қасрлар қуриб беришар эди. Ғаввос шайтонлар эса денгиздан дуру маржонлар териб беришарди.

«Ва бошқаларини ҳам кишанланган ҳолда тўплаб».

Яъни бошқа ўзбошимча шайтон-жинлар кишанланиб, иккита-иккита ёки кўпроқ ҳолда бир-бирларига жамланиб, Сулаймон алайҳиссаломга бўйсундирилган эди. Улар Сулаймон алайҳиссалом хоҳлаган ишларни бажо келтиришарди.

Абу Ҳурайра розияллоҳу анҳудан ривоят қилинади:

«Набий соллаллоҳу алайҳи васаллам:

«Кеча жинлардан бири Ифрит менга намозимни бузиш учун бирдан йўлиқиб қолди. (Ёки шунга ўхашаш сўз айтдилар). Шунда Аллоҳ унга нисбатан менга имкон берди. Ҳаммангиз эрталаб туриб, унга назар солишингиз учун уни масжиднинг устунларидан бирига боғлаб қўймоқчи бўлдим. Шунда биродарим Сулаймоннинг «Эй Роббим, менга мендан кейин ҳеч кимга берилмайдиган мулкни бергин», деган гапини эслаб, уни ноумид қилиб, қайтариб юбордим», дедилар».

Икки шайх ривоят қилишган.

Аллоҳ таоло Намл сурасида марҳамат қиласи:

«Жинлардан бўлган Ифрит: «Мен уни сенга ўрнингдан тургунингча келтиурман. Албатта, бунда қувватли ва ишончлиман», деди» (39-оят).

Араб тилида ёмонликда учига чиқсан ва қувватли жин-шайтон «ифрит» дейилади. Бу сўз шайтонга ўхашаш одамга ҳам ишлатилади. Ифрит сўзи луғатда қудратли, ғалаба қилувчи маъноларида келади. Энг сержаҳл, айёр, қучли-қувватли жинлар ифрит деб аталади. Ифрит номи Қуръони Каримнинг (Намл сурасида зикр этилган 39—оят)

Сулаймон алайҳиссаломга Сабаъ маликаси Билқиснинг тахтини олиб келишга аҳд қилган пайғамбарнинг аскарларидан бири бўлмиш паҳлавон жиннинг номи Ифрит эди.

Аллоҳ таоло Сабаъ сурасида марҳамат қиласи:

**«У(жин)лар унга мәхроблар, ҳайкаллар, ҳовузлар каби лаганлар ва  
собит қозонлардан хоҳлаганини қилиб беришар эди» (13-оят).**

Аллоҳ таоло томонидан Сулаймон алайҳиссаломга бўйсундирилган жинлар у кишига мәхроблар, яъни улкан ибодатхоналар қуриб беришар, турли нарсаларнинг ҳайкалларини ясад беришарди. Таом ейдиган лаганлари ҳовуз каби катта бўлар эди. Ўша вақтда шунга эҳтиёж бўлган бўлса керак. Шунингдек, одамлар бажара олмайдиган ишларни қиласиган жинлар ҳақиқатда ҳам Сулаймон алайҳиссаломга мўъжиза сифатида кўрсатилган бўлиши мумкин. Сулаймон алайҳиссаломга тоғ каби собит қозонларни ясад бериш ҳам жинларнинг вазифасига кирар эди.

**«Фолбинлик, сеҳргарлик, жин чиқариш ва ноанъанавий даволаш  
каби ишларнинг бор ҳақиқати» китобидан**